

Inatsisartut suleriaasianni § 37, imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqqutit:

1. Kalaallit Nunaanni paarsisartunik ilaqutariinnik akuersissuteqarfigineqarsimasunik qassinik peqarpa, kommunikkaartumik agguataarlugit?
2. Paarsisartunik ilaqutariinnut ullumikkut suut tapersiinertut neqeroorutaappat, matumani tarnip pissusaanik immikkut ilisimasalimmik ikiorsiineq, nakkutiginninneq (supervision), oqilisaassineq kiisalu pikkorissartitsinerit ilinniaqqinnerillu ilanngullugit?
 - a. Taamaattoqarsimanngippat Naalakkersuisut isumaliutersuutigaat paarsisartunik ilaqutariinnut nuna tamakkerlugu aqqissuussinermik pilersitsinissaq, tassani tarnip pissusaanik immikkut ilisimasalimmik ikiorsiineq, nakkutiginninneq (supervision) kiisalu pisariaqartitsisoqartillugu piaartumik siunnersorneqarnissamut periarfissaqarnissaat?
 - b. Kommunit akornanni paarsisartunik ilaqutariinnut tapersiinnermut aqqissuussinerni assigiinngissuteqartoqarpa?
 - a. Aappiuppat, suut assigiinngissutaappat?
 - c. Ukiuni kingullerni tallimani paarsisarnermut inissiinerit qassit piffissap naammassinnginnerani unitsinneqarsimappat, tamatumunngalu pissutaasut suut nalunaarsorneqarsimappat?
 - d. Naalakkersuisut misissorsimavaat paarsisartunik ilaqutariinnut naammattumik tapersiinnnginneq inissiisarnerit kipitinneqarnerisa amerlassusaannut sunniuteqarnerisq?
 - e. Naalakkersuisut suliniuteqarnissamut pilersaaruteqarpat paarsisartunik ilaqutariinnut tapersiinnissamut nuna tamakkerlugu minnerpaaffissanik aalajangersakkani suliaqarnissamut, taamaalillutik paarsisartunik ilaqutariit meerartaallu najugaqarfiat apeqqutaatinngu assigiimmik atugassaqartinneqarnissaat qulakkeerneqassammat?

(Inatsisartunut ilaasortaq Isak Johannesen, Naleraq)

Tunngavilersuut:

Paarsisartunik ilaqutariit meeqqanut, amerlanertigut annertuumik artornartunik misigisaqarsimasunut, toqqissisimasumik peroriartorfissamik pilersitsinnerminni



akisussaaffimmik annertuumik tigummiaqarput. Meeqqap patajaatsumik inissinneqarnissaa anguniarlugu paarsisartunik ilaqutariit pisariaqartitaminnik suliamut tunngasumik tapersersorneqarsinnaanissaat pingaaruteqarpoq.

Kisiannili kommunit akornanni tapersiinermut tunngatillugu assigiinngissuteqartoqarnersoq, aammalu paarsisartunik ilaqutariit pisariaqartitamittut ikiorserneqartarnersut pillugit ernumassuteqartoqarpoq.

Apeqqutit siunertaraat ullumikkut suliniutaasut pillugit ataatsimut takussutissamik pissarsinissaq kiisalu paarsisartunik ilaqutariinnut tapersiinermik nukittorsaasinnaasunik, taamaalillunilu inissinneqarsimasunut atugassarititaasunik pitsanngorsaasinnaasunik, nuna tamakkerlugu suliniuteqarnissaq pisariaqartinneqarnersoq qulaajarneqarnissaa.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.